



*Kamis, 24 Nopember 2022*

**Ogen: 1 Timotius 2:11-15**



**BALI NGE HAK**



Konflik eme situasi si turah erkiteken la siangkan, kedungenna mpeturah perubaten. La sitik sierbahanca turah konflik enda, umumna lit iakap si la adil, la bujur, irugiken. Tapi situhuna, komunikasi me enda salah sada kuncina, la si tangaren, kita siakap sibenarna. Melala kal si ceda dikune turah konflik enda dingen la terdungi. Lit deba perkade-kaden si ceda, lanai sidahi-dahin, urak teman meriah. Deba jabu si sontar, kedungenna sirang, anak-anak si terlantar. Amin bage gia, situhuna konflik enda banci jadi batu loncaten kubah kegeluhen si lebih mehuli, lebih maju dikune banci 'terkelola' terdungi alu mehuli. Tapi la sitik kita ndungi konflik enda alu cara si la payo.

Bagenda me siituriken ibas renungenta enda. Kemajun ibas perpulungen erbahanca kerina kalak nggejabken keleng ate Dibata. Kerina ngerana tapi mbelin pengaruh budaya, lit si la ngasup ngergai diberu janah ngaloken ia kuga litna. Termasuk ibas ngerana. Rikutken kecibal sibage rupana, maka Paulus ncubaken nengahi persoalen-persoalen si turah alu mbatasi peran serta diberu ibas kegiatan perpulungen khususna ibas ngerana. La iakapna payo sekalak diberu ngajari dilaki apai ka seh njabapi (berdebat). Dikune sekalak diberu lit atena isungkunna, kerna kai si la iangkana, ula pada itengah perpulungen nungkun, sinik saja ula pada ngerana. Irumahlah ia nungkun man perbulangenna.

Tentuna kecibal sibagenda rupana, lanai bo man ikuten, la sitik perubaten si jadi, emaka labo man pegelgelen. Budaya si lit ibas kegeluhen suku-suku enggo iterangi Pustaka Si Badiaseh maka ncibalken dilaki ras diberu, seri iadepen Dibata. Emaka seri nge hakna ibas kai pe, la saja ngerana tapi pe muat bagin ibas perpulungen.